

成實論卷第十一

舍一

訶 梨 跋 摩 造

姚 秦 三 藏 鳩 摩 羅 什 譯

身見品第一百三十

五陰中我心名為身見實無我故說緣五陰

舍一

五陰名身於中生見名為身見於無我中而
取我相故名為見問曰於五陰中作我名字
有何咎耶如瓶等物各自有相是中無過我
亦如是又若說離陰有我是應有咎答曰雖
不離陰說我是亦有過所以者何諸外道輩

說我是常以今世起業後受報故若如是說
五陰應即是常又說我者以我為一然則五
陰即應是一是名為過又我即是過所以者
何以我心故有我所有我故起貪恚等一
切煩惱故知我心是煩惱生處又此人雖不
離陰說我以取陰相故不行於空不行於空
故生煩惱從煩惱生業從業生苦如是生死
相續不斷又是人以計我故尚不能得麤分
別身頭目手足況能分別諸陰以受我一我
常故若不分則何能入空又若見我則畏泥

洹以我當無故如經中說凡夫聞空無我生
大怖畏以我當無故都無所得如是凡夫乃
至貪求癡野干身不用泥洹若得空智則不
復畏也如憂波斯那經說清淨持戒人善修
八聖道命終時心喜猶如破毒器又若說有
我即墮邪見若我是常則苦樂不變若不變
則無罪福若我無常則無後世自然解脫亦
無罪福故知身見是重罪也又身見者名爲
甚癡一切凡夫皆以身見亂心深著有故往
來生死若見無我往來則斷問曰若五陰無

我衆生何故於中生我心耶答曰若聞人大
男女名相想分別故則生我心亦以非因似
因故生我心所謂若無我者誰受苦樂威儀
語言起罪福業受果報耶又於無始生死久
集我相則成其使如瓶等相故生我心又於
諸受陰中我心生非不受中故謂生我心處
此中有我所以者何不一切處生我心故又
以愚癡故生我心猶如盲人得瓦石等生金
玉想又是人未得分別空智癡故見我如於
幻夢乾闥婆城火輪等中而生有想問曰現

見色身髮毛爪等諸分各異云何智者以之
爲我答曰有人見神如麥如芥子等住於心
中婆羅門神白刹利神黃連舍神赤首陀羅
神黑又韋陀中說冥初時大丈夫神色如日
光若人知此能度生死更無餘道小人則小
大人則大住身窟中又坐禪人得光明相見
身中神如淨珠中縷如是人等計色爲我羸
思惟者說受是我以木石等中無受故可知
受即是我中思惟者說想是我以苦樂雖過
猶有想我心故細思惟者說行爲我以瓶等

相雖過猶有思我心故深細思者說識爲我
知思亦羸是思雖過猶故有識我心故又於
五陰中生我心是人不能分別受等諸陰於
色心中合生我想如於色等四法總生瓶想
以色等差別有二十分見色是我所以者何
色是我了法受等所依此諸受等繫在於色
故謂色爲我有人見色住受等中受等是不
了法故色所依止如虛空不了故地等依止
如是二十分皆由癡生問曰眼等中何故不
說我分答曰亦有如經中說若人說若眼是

我是則不然所以者何眼是生滅若眼是我我則生滅又眼等各各相別若說眼是我耳等非我是則不然若耳等復是則一人多我色等中有差別故可得說色是我而非受等問曰若說無我亦是邪見此事云何答曰有二諦若說第一義諦有我爲身見若說世諦無我是爲邪見若說世諦故有我第一義諦故無我是爲正見又第一義諦故說無世諦故說有不墮見中如是有無二言皆通如虎嚙子若急則傷若緩則失如是若定說我

則墮身見定說無我則墮邪見又過與不及二俱有過若定說無是則爲過若定說有我其名不及故經中說應捨二邊若第一義諦故說無世諦故說有名捨二邊行於中道又佛法名不可諍勝若說第一義諦故無則智者不勝若說世諦故有則凡夫不諍又佛法名清淨中道非常非斷第一義諦無故非常世諦有故非斷問曰若法第一義諦故無便應是無何爲復說世諦故有答曰一切世間所有言說謂業及業報若縛若解等皆從癡

生所以者何是五陰空如幻如燄相續生故
欲度凡夫故隨順說有若不說者凡夫迷悶
若墮斷滅若不說諸陰則不可化以罪福等
業若縛若解皆不能成若破此癡語則自能
入空爾時無諸邪見是故後說第一義諦如
初教觀身破男女相故次以髮毛爪等分別
身相但有五陰後以空相滅五陰相滅五陰
相名第一義諦又若說世諦故有則不須復
說第一義無又經中說若知諸法無自體性
則能入空故知五陰亦無又第一義空經中

說眼等以第一義諦故無世諦故有大空經
中說若言是老死若言是人老死若外道言
身即是神若言身異神異是事義一而名異
若言身即是神身異神異是非梵行者若遮
是人老死即說無我若遮是老死即破老死
乃至無明故知第一義中無老死等言生緣
老死皆以世諦故說是名中道有羅陀經中
說佛語羅陀色散壞破裂令滅不現乃至識
亦如是如石壁等以不實故可令不現諸陰
不現亦以第一義無故隨諸陰相在則我心

不畢竟斷以因緣不滅故如諸樹雖剪伐焚燒乃至灰炭樹想猶隨若此灰炭風吹水漂樹想乃滅如是若破裂散壞滅五陰相爾時乃名空相具足又如經說汝羅陀破裂散壞分拚衆生令不現在是經中說五陰無常衆生空無先經中說五陰散滅是爲法空

邊見品第一百三十一

若說諸法或斷或常是名邊見有論師言若人說我若斷若常是名邊見非一切法所以者何現見外物有斷滅故經中說有見名常

無見名斷又身即是神名爲斷見身異神異是名常見又死後不作名曰斷見死後還作名爲常見死後亦作亦不作是中所有作者名常所不作者名斷非作非不作亦如是問曰是第四不應名見答曰是人於世諦中亦無人法故名爲見常無常邊無邊等四句亦如是又經中說六觸入盡滅有異餘即爲常無異餘即名斷又若見我先作後當更作是名常見我先不作後不更作是爲斷見又邪見經說人身七分地水火風苦樂壽命若其

死時四大歸本根歸虛空又說以刀輪害衆生積爲肉聚無殺生罪是名斷見及梵網經中說斷見相若言有後世作者即是受者是名常見問曰斷常見云何生答曰隨以何因緣說死後還作是因緣故生常邊見隨以何因緣說死後不作是因緣故生斷滅見問曰此見云何斷答曰正修習空則無我見我見無故則無二邊如炎摩伽經中說若一一陰非人和合陰亦非人離陰亦非人現在如是不可得云何當說阿羅漢死後不作故知人

不可得人不可得故我見及斷常見亦無又見諸法從衆緣生則無二邊又如說見世間集則滅無見見世間滅則滅有見又行中道故則滅二邊所以者何見諸法相續生則滅斷見見念念滅則滅常見又說五陰非即是人亦不離陰是人故知非常非斷舍一能得異身故不得爲一俱是衆生故不得爲異又五陰相續故有衆生生死是中不得言即以是相續生故亦不得言異以相續中可說一故又說此陰彼陰異故不得言常從自相續因緣

力生故不得言斷

邪見品第一百三十二

若實有法而生無心是名邪見如言無四諦
三寶等經中說邪見謂無施無祠無燒無善
無惡無善惡業報無今世無後世無父母無
衆生受生世間無阿羅漢正行正至自明了
證此世彼世知我生已盡梵行已成所作已
辦從此身已更無餘身者施名爲利他故與
祠名以韋陀語言因天故祠燒名於天祠中
燒蘇等物善名能得愛果三種善業惡名得

不愛果三種惡業善惡業報名今世善惡名
等及天身等後世報今世名現在後世名未
來父母名能生衆生受生名從今世至後世
阿羅漢名盡煩惱者謂無此事故名邪見又
衆生垢淨有知見無知見皆無因緣又無力
無勇及此果等名爲邪見取要言之所有倒
心皆名邪見如無常常想苦爲樂想不淨淨
想無我我想非勝勝想勝非勝想淨道非淨
道想非淨道淨道想無中有想有中無想如
是等諸顛倒心謂阿毗曇中五見梵網經中

六十二見皆名邪見問曰是邪見云何生答
曰以癡故生染著非因似因故邪見生又以
染著樂因故說無苦又失空道故說無苦以
無受苦者故若說世間萬物無因無緣或說
因自在等不因於愛是名無集隨以何因緣
說無泥洹或異說泥洹是名無滅若無泥洹
道何所至耶或說更有異解脫道謂斷食等
是名無道無佛者是人言諸法無量云何一
人能盡知耶或生是念佛爲人中之尊以無
人故當知無佛無煩惱盡故名無法無有正

行得此法者故曰無僧以布施現果不可得
故謂無常施又有經書中說無布施比如亦
不決定世間有好布施者而更貧窮有慳貪
者而得富貴以是等因故說無施無祠無燒
亦如是若火燒物爲灰是中有何等果無善
惡無善惡業報者言若神是常則無善惡若
神無常則無後世無後世故則無善惡無善
惡業報無今世者分擘諸法終歸都無無後
世者隨以死後不作因緣故謂無後世無父
母者亦以分分擘之今盡又說如因糞生蟲

糞非蟲父母又頭等身分非即父母身分又諸法念念滅故以何爲父母耶無衆生受生者衆生法無故今世尚無況能受身又思惟言是衆生爲是身耶爲非身耶若是身者眼見此身埋則爲土燒則成灰蟲食爲糞故無受生非身則有二種若心若離心若是心心法生滅念念不住況至後身若離心則不計我於他心中尚不計我況無心處是故無受生者無阿羅漢者是人見一切人飢則求食寒則求溫熱則求涼毀害則瞋敬養則喜故

無有能盡煩惱者又經書或說無阿羅漢隨逐此經故生此見垢淨等無因緣者是人見此垢法自然而生又有垢者即體是垢故說無因知見無知見亦如是無力無勇者見一切衆生皆假因緣或有言由自在天能有所作又見衆生屬業因緣不自在故說無力無勇及此果無常常想者隨以何因緣破念念滅以是因緣故生常見又說諸法滅時還爲微塵或言還歸本性又諸法雖滅以憶想故能受苦樂則生常想又說神是常音聲亦常

以是等緣故生常想苦謂樂者隨以何因緣
說言有樂如先三受品中說以是因緣故生
樂想不淨淨想者以染著身故眼見不淨而
生淨想或作是念我得人相見此人身不淨
更有衆生以之爲淨如是等緣故生淨想無
我我想者見陰相續生而取一相以之爲我
又如先生身見因緣以是因緣故生我想非
勝勝想者是人於富蘭那等外道師中而生
勝想又梵王自說我是大梵天王造萬物者
如是等有人言若人具足受五欲樂是名勝

法又言若人離欲入初禪乃至四禪是最勝
法又說世間現見衆生中婆羅門爲尊非現
見衆生中天爲最尊是非勝勝想勝非勝想
者一切衆生中佛爲最勝有人於中不生勝
想作如是言是刹利種又學道日淺又謂佛
法言不巧妙文辭煩重不如韋陀此不名勝
衆僧中有四品人是故不勝如是等勝中生
非勝想非淨道中淨道想者若人言以灰水
等洗令人清淨又說生死盡訖名清淨道又
但貪著持戒梵行供養天等亦說由自在天

故得清淨或說苦行本業盡故名清淨道又
斷葷辛及酥酪等故得清淨又淨洗浴以韋
陀呪然後飯食名清淨道以如是等種種耶
道而得解脫不以八直爲清淨道有中生無
想者若法世諦中有亦說爲無無中生有想
者若說有陀羅驪有有分者亦說有數量等
求那亦說總相別相及集亦說世性等無物
爲有如是等因緣生顛倒心皆名邪見於此
邪見中別四種見餘殘重者皆名邪見問曰
是邪見云何斷答曰經中佛說正見能斷邪

見問曰正見云何生答曰若見聞比知正決
定故則正見生又善修正定則正見生如經
說攝心能如實知非散心也問曰是邪見有
何等過答曰一切過咎及諸衰惱皆由邪見
此人謂無罪福及善惡業報故現在無諸好
事況未來世如是破善惡人名斷善根決定
當墮阿鼻地獄如阿毗曇六足中說殺是人
罪輕殺蟲蟻又此邪見人汙染世間爲多損
減衆生故生如毒樹生爲惱害故又此人所
起身口意業皆爲惡報如經中說邪見人所

起身口意業欲瞋思念皆爲惡報如種苦瓠
拘賒毒枝必周曼陀樹種是中所有地種水
火風種皆爲苦味以種苦故如是邪見人諸
餘心心數法以邪見故皆得惡報是故此人
雖爲施等終無好果以先爲邪見心所壞故
是人所作不善皆是增上以久集惡心故又
以戒法故能制非法是人無善惡故無所禁
忌深爲放逸行不善法定破慙愧二種白法
與畜生無異又若人言無善惡是人心中常
懷不善又是人無有能受善法因緣所以者

何是人不能親近善人不聞善法惡心易起
善心難生以易起惡故無善因緣如是漸積
則斷善根又此邪見人名在難處如地獄衆
生不任得道如此人雖生中國具足六根能
別好醜亦不任得道又此邪見人無惡不造
不忌輕重又少作不善亦墮地獄以重罪心
起是業故如業品中解地獄業以是因緣此
人所作皆爲地獄又此人不能盡罪惡業以
不善法常在心故又此人展轉地獄難得解
脫所以者何斷善根人若善根未相續間終

不脫地獄是人邪見在心中故善根云何得相續耶又邪見人名不可治猶如病人死相已現雖有良醫不能復治是人亦爾無餘善故乃至諸佛亦不能治是故必墮阿鼻地獄二取品第一百三十三

於非實事中生決定心但是事實餘皆妄語是名見取及先說非勝法中定生勝想亦名見取問曰見取有何過答曰是人得少功德自以爲足又是人唐勞其功所以者何是人於非善事中生妙善想勤加精進以此因緣

後則心悔又是人爲智者所笑以非勝中生勝想故又若人非勝謂勝是愚癡想猶如盲人於瓦礫中生金銀想爲有目者之所輕笑見取有如是等過若人捨智以洗浴等戒望得清淨名爲戒取問曰不以戒故得清淨耶答曰以智慧得清淨戒爲智慧根本問曰戒取有何過答曰所說見取之過以下事爲足等皆是此過又戒取因緣唐受諸苦謂受寒熱卧灰土木刺棘等上投淵赴火自墜高等後世亦受劇苦果報如經中說持牛戒若成

則還爲牛若不能成則墮地獄又此人從冥
入冥以受此法現世得苦後亦苦故又此人
得深重罪所以者何以非法爲法毀壞眞法
亦謗行正法者今多衆生背眞淨法墮罪中
故積集大罪必受阿鼻地獄果報寧止不行
勿行邪道所以者何若本不行易令行道邪
行敗心故難入道又雖是怨賊不能令人衰
惱如生邪見所以者何怨賊不能汙人如隨
逐邪見受外道所行種種邪戒裸形無耻灰
土塗身拔髮等故又此邪見者皆失世間一

切利樂現在失五欲樂後失生善處樂及泥
洹樂若人求樂得苦求解得縛不名狂耶所
以者何以施一食因緣可得生天此人行邪
行故雖施身命無所利益

隨煩惱品第一百三十四

心重欲眠名睡心攝離覺名眠心散諸塵名
掉心懷憂結名悔所謂不應作而作應作而
不作曲心詐善名諂諂心事成名誑自作惡
不羞名無慙衆中爲惡不羞不難名無愧心
隨不善名放逸實無功德示相令人謂有名

詐現奇特爲利養故口悅人意名羅波那欲
得他物表欲得相如言此物好等名爲現相
若爲些毀此人故稱讚餘人如言汝父精進
汝不及也名爲激切若以施求施言是施物
從某邊得如是等名以利求利若人有喜睡
病名單致利若得好處行道因緣具足而常
愁憂名爲不喜若人頻申身不調適爲睡眠
因緣名爲頻申若人不知調適飲食多少名
食不調若不堪精進名爲退心若諸尊長有
所言說不敬不畏名不敬肅喜樂惡人名樂

惡友如是等名隨煩惱從煩惱生故
不善根品第一百三十五
三不善根謂貪恚癡問曰憍慢等亦應是不
善根何故但說三耶答曰一切煩惱皆是三
煩惱忿慢等是癡分故不別說又三種煩惱
多在衆生心中慢等不爾又一切未離欲者
乃至蚊蟻是三煩惱皆在心中憍慢等不如
是又貪是瞋不善根違失所貪則隨生瞋癡
爲二本所以者何若人無癡則不貪瞋又經
中說十不善業有三種從貪恚癡生不說從

慢等生又有三種受更無第四是三受中三煩惱使若別有慢等於何受中使是事實不可說當知此三是諸煩惱本問曰何故樂受中貪使答曰現見此中生故如經中說人得樂觸生喜若觸則不喜是人於諸受中集滅味過出不如實知故不苦不樂受中無明使使所以者何是人於無色界繫諸陰相續不如實知故則是中生寂滅想若解脫想若不苦不樂想若我想是故說不苦不樂中癡生問曰是諸使爲法中使衆生中使耶答曰

因法生衆生心隨衆生心則受諸受隨諸受貪等煩惱使故知因法生使而使衆生何以知之若衆生未斷此使則此使使若斷則不復使若法中使法常有故使應常使常不應斷故又非衆生數亦應有使若然者若以人使故壁等有使以人識故壁等亦應有識是事實無又然則無阿羅漢餘人使故有使問曰是使未斷則使斷則不使答曰二種使使一緣使二相應使是使若斷若不斷即是緣及相應何故說斷則不使若爾更應說第三

使相以不可說故當知無矣又使能緣異地而不使故知但衆生中使非法中也問曰二種使使一緣使二相應使是衆生諸使非緣非相應云何當使答曰是事先答諸使因法生而使衆生如阿毗曇身中說欲界衆生幾使使等若不使衆生云何有如此問問曰若使使衆生經中說樂受中貪使此則相違答曰是不盡語應言樂受中生貪而使衆生問曰是貪亦因色等生此中何故但說因樂受生答曰以憶想分別歡喜等故貪生非但從

色等生問曰因苦受亦生貪如說樂者不求苦者多求何故但說從樂受生答曰不以苦受故貪生是人爲苦所惱故於樂受中生貪問曰不苦不樂受中亦貪使使何故但說樂受中耶答曰是人以不苦不樂受爲樂故貪生故說樂受中貪使以此三受中三煩惱使故但說三

金一

十五

成實論卷第十一

音釋

礫 綫隄主切
小即狄也切
石也劇含呼監切
甚也激口析先的切
動也歷切
也同驃毗召切

永樂北藏

成實論

第一二〇冊

永樂北藏

成實論

第一二〇冊